

Kholchilna Report

Myanmar Coup jou Chindwin Sahlam sanahol/natoh Kholchilna 2023



Sepaiyin thaneina achulhah (Coup) jou Chindwin Vadung le Uruk Vadunga sana boldan alaimun kimanchahna ho chungu Kuki Women Human Right Organization in akholchilna thu lekha ahi.

Myanmar Coup jou Chindwin vadungsahlam

**LEINOI SANA HOL
NATOH HOISET DAN
KHOLCHILNA**

2023

Sepaiyin thaneina achulhah (Coup) jou Chindwin Vadung le Uruk Vadunga sana boldan alaimun kimanchahna ho chungu Kuki Women Human Right Organization in akholchilna thu lekha ahi.

www.kwhro.com

Email: kwhro2013@gmail.com

Facebook: Kuki Women Center Tamu

Address: W-no (2), Home guard veng, Moreh
Tengnoupal District, Manipur, India
Pobox : 759131

Holbaina

1. Kholchil Kibolna Doi le Tup
2. Kholchil Kibolna Amun Misim Vetdohna
3. Natoh dan ho
4. Report Agom
5. Sana Bolna le Khomite ho Hindan
6. Angai Natoh le Kilolvahna
7. Company Natong ho
8. Sana Bol Jeh'a Hungsoh Ga-phalou ho (Twi, Nilego, Adang)
 - Khangdong le Natoh
 - Khamnathei Lou
 - Numei le Natoh
 - Hutum Engbolna
 - Damdoi Lam
9. Thugel
10. Banjoma Kholchil dingho

Kuki Women Human Rights Organization

1988 kum Myanmar gamsung Students uprising jouva hung jamdoh Kuki themjil numei hon-khat chu India Gamsung, Manipur, Moreh khopi a AD kum 2000 a ahin phudoh u ahi. 2004 kum in Myanmar gamsung Ethnic(Trible) Numei Kiloikhomna Women League of Burma member ahunghito kilhon'in, kolgam sunga numei jat le nam kiloikhom ho toh federal democracy, numeite ho chanvou ding le Mihem Penpi Chamlahah ho a dingin pan ala jing uvin ahi. 2014 May lha in kolgam Kivaipohna ahung nop jep toh kilhonin Sagaing Region, Tamu khopi sungah Office ahin phutdoh uvin chu jouvin Homalin khopi sunga jong Sub-office ahin tungdoh bevin ahi.

Doi-le-Tup le Bidoi

1. Akhang akhanga suhnem'aum jing Kuki numeite ho khankho dopsang nading le Jatnam chondan sunga numei pasal kikhenna suh-tang ding.
2. Gamgi a cheng numeite ho khankho venbit nading le chamdel'a hinkho manthei nadinga na toh ding.
3. Kukite chenna gamsunga Hutum Engbolna ho kholchil'a phondoh ding

Tohgon ho

Tupet'a tohgon ho chu:-

1. Numeiho chungah Hutum Engbol Suhmang ding tohgon
2. Numeiho dinga lumdal le lhamon thapeh ding tohgon
3. Numei thil boltheina dopsang ding tohgon
4. Chamna le Kicham sem ding tohgon
5. Leimun le Thilsemho ventup ding tohgon
6. Numei Chamlatna le venbitna tohgon ho ahi.

Kholchil Kibolna Doi-le-Tup

2021 kum'a Sepaiyin thaneina achulhah (Coup) jouva, Sagaing Region a um Chindwin le Uruk Vadung pang jouse le gam leiset jouse leinoin Sana abol uhi masanga sangin khohse cheh'in abol uvin, chule Company nei hon Gamsung boi hi amaho phatchomnan amanguvin amun a cheng khomite chungga dan neilouva thahat hutum a na atoh hou mipi hetttheiya phondoh ding doi le tup le mai makho Federal gam sem teng, thil manlu ho (natural resources) ho chungga vaihom ding thu kihoulim phat le lunggel seikhomna a Manchah thei ding doi le tup ahi.

Kholchilna khomunho le Misim Vetna

No	Kholchilna khomun ho	Thudoh kinei misim		
		Pa	Nu	Agom
1	Hkenam kho	3	2	5
2	Mai kaing kho	3	2	5
3	Moelin kho	1	2	3
4	Boljang kho	2	1	3
5	Khomunnom	1	2	3
6	Marlone kho	2	3	5
7		1	2	3
8	Manly kho	4	1	5
	Agom	17	15	32

Natoh dan Tools ho

Tu Gamsung dinmun hi imalam jouse hahsa ahitoh lhonin, thutan vaihomna umlou lai tah ahi. Alei mun kholtoho masanga itohnom amun umdan ho kholchilna akineiyin, aleimun a thal choi thanei ho umdan ho kidongtoho a kibol masa ahi. Chule Manchah ding thudoh ding danho jong abol them ojaho toho kibol ahivang chun akhomun a um miteho dia aphot aphatlou hetthei nadin kho khat patepna kibol ahi.

Chindwin Vadung panga sana bolna mun tampi um jongle amun khol'a cheho lampia kiven theina dingin Sana bolna amun a um khomite ho toho kihoutohna akineiyin chu jouvin Chindwin Vadung panga mun (4) le Uruk vadunga mun (4) abon'a mun (8) hi amun tah'in kholchilna akinei theiyin ahi.

Thudoh bolna sunga hin, sana bol khomite ho lah'a ahou ho, aneijou jep ho le mivaicha ho kom'ah leng-kibah theina din hiti chun thudoh akineiyin ahi. Chindwin Vadung sahlam'a um Homalin, Khamti khopi le Uruk Vadung pangho a sana kibolna mun ho aleimun tah'a akichen kholchilna akineiyin ahi.

Thu makai


Hiche sana kibolna mun kholna akon in, Chindwin Vadung chunglam le Uruk Vadung ahin, sana manpha tah tah ahung kon thu akimudoh e. Akhomite hon machine manglouvin ajokham khamin sana akihol uvin, neh le chah chule chapang ho school kaina din sum ki-holnan amanguvin ahi.

Chule Chindwin vadunga Mei-tha Megawatt 1200 sodoh thei Thamanti Dam tohgon jalin kum 2007/2008 apat in Sana bol Company len-tah tah ho le Thingbol Company ho ahung lut uvin, 2015 in Company alen aneo agom'in (100) val ahung um in ahi. Hiche a pat chun Chindwin Vadung twi hi aniehpah tan, hise gu-twi adim in, twi-lam ah nel le song ahung let tan Motor boat (sethlay) Kuong chena ahung hahsa tai. Vadung panga cheng mipi tehon, hiche twi adon, lou-lho kivahna a aneiuva chule kin le dong che le va le na a hiche twilam amanchah u ahi.

2021 kum'a Sepai hon thaneina achulhah (Coup) jouvin, hiche sana bolna munthah akehlou vanguvin, atohnau leimun akeh be-be uvin chule munchom gamchom a konin Company len tampi ahung lut-be in ahi. Amun a um khomite hi Gamsung kivaipoh achatvai jeh'a Diesel le patrol thaotwi chule thilman asan behseh phat in atong jou tapouve. Munchom chom a um Company len ho, Sepai toh kikhutjop loi, thalchoi ho loiyin adeitah in mun akilo uvin kichepnan anei tauve.

Chule thaneina achulhah (Coup) jouva Gamsung hoilou hi mihem lung kikhelsah thei kham-nathe i louchang, Heroin (No. 4) joh hon dan neilou tah'in manlai cha'n ajoh tauvin ahile Khangdong mitampi lou-ne ahung pung-jah e. Hiche hi akikhol le gamvaipo sepai hon Manchah khat a anei ahiu akihedoh in ahi.

Alei mun'a um mipite hon gam le go, leimun ho asuhset peh phat uvin natoh nading mun nei talouvin aleimun hou jong songchang le nel-go asoh gam tan ahi. Gucha, michom le miji micha a-suhset ujong le aheh nading Pichal mun umlouvin thutah amang tan ahi.



Sana Kibol nale Khomi ho Dinmun

Amun a um mipite hon company len tampi ahung lut'a sana abol til chun chapang Khang-dong hon natohnan anei uvin, thiljoh jong masanga sangin sum atammu uvin apha danin agel uvin, khangtou l'eh dan in akigel uve, phat ahungsot phat in phatchomna le phatchom nalou ho ahin gelkah tauvin ahi. Ahin abang kon-khat hon agam, aleimun, akho mun hou chule khangthah mitampi hinkho achatvai hou nahsah louvin ama changphat chomding bou agel nalai uve. Hiche lah'a akhohpen chu amahon dontwi le twi-lam'a amanchah u Chindwin vatwi hiche sana bol jeh'a akan a aset hi agelkhoh pouve.

Hiche Chindwin Vadung ahung damdoh kit thei nadinga Kuki Numei Kiloikhom hon 2015 kum'a pat in Vadung twi aset a akan thudol in kholchilna le phondohna (report) akibol vangin Gamsung vaipo ho le thalchoi thanei hon tuni changei jin ima donbutna anei hih laiue. Sepai hon thaneina achulhah (Coup) masang chun Sana bol mikhat in lhasum lakh 2 a pat lakh 3 changei amuthei uvin ahi. Ahin, sepai hon thaneina ahin chelhah (Coup) jouvin thilman asangpen in ahung kal tan ahile khomi natong ho lhasum hi company neihon lhasum akalpeh poi. Sana bolna leimun ho jong company nei hon amaho deidei jin abol tauvin ahile khomite ho kinepna beiyin hinkho amanguvin hahsatna atoh tauvin ahi.

Asesa hon-lei mun khat a khomite hon na atoh pet



Khomi Khat toh thudoh Bolna

“Masang chun Company hon sana bolna dinga khomite ho golei, phailei le chalei ho jong akham khamin sum apen akichoh jiuvin boina aum behseh poi. Tua Gamsung ahung boi phat in khomite anoise uvin, khomiten alunglhai louna ho chungga Thutanna umlou ahi tai. Chule Sepai, Palih, gam Haosa, kho Haosa le thal choi dang dang hon hutum’a sum adon phat uvin khomite din anasa lseh e.”



Thinglhang loulhou vaikon khosung miho

Natoh Kilolva dan

Chindwin Vadung pang hi sana konna mun ahivangin, khomite hon thinglhang lei lho le phailei bol hi kilolvahna in ananei uve. Chindwin vapanga cheng khomiten Vadung panga leipha leithao umna ho mangchan an-kam, mye-be, be le adang dang muchi ho atu jiuve. Chule honlei ho ah Kom-la phung, Da-nyin phung, Cha-phung le go-phung ho aphut uvin kivahnan anei uve. Gencha vahna lam’a Bong le Loi ho hi phailei honlei kaina din avah uvin, chule Ahcha, Vohcha, Vatot ho hi neh le chah din avah uve.

Pasal hon insunga me din vadungah Nga ahol uvin, numei hon chana lo le meholin hiche gam le Vadung mangchan apu-apa akhang akhaga a-ngai natoh bangin Kilolvahnan anei uve.

Tu hin, khomite hon thinglhang lei, golei le honlei ho hi sanabol ho toh kilungtoh a joh, sana bol jeh’a song toh dim gam, abang company hon thalchoiho toh kihoutoh a khomite ahung ngam nalou dinga sum themcha pe’a gihna nei, chule abang chu sana bol jeh’a honlei munho segam a akhang akhanga akivahnau ho boljom thei talouva company ho chungga kingam in hinkho amang tauve.

Khomi Khat toh thudoh Bolna

“ Keiho khomite in company lenho ahung lut masang chun Khal, Chuh le Phal-bi ama ama phat dung juiya muchi theiga katu jiu ahi. Thinglhang lou chang jong kumkhat ding lhingsel kanei uvin, Me le theiga ho jong pam’a choh ding angai hih e. Tu hin sana bol jeh’in Thinglhang lou chang jong atongkha in, louva muchi ga ho jong agu kihelouvin ne jong aki nekha tapoi. Choh le gim tah’a kitonga eiman akineh khahlou phat in tu-langin aki-tu nom tapon, pama hung joh ho kom’ah akiki choh tai. Hiti hin them khat khat in natos neilouvin aki um gam tai. Chule abang leimun ho hi ijoh nom’a kijoh hilouva dan neilouva dan’a hutum jeh’a kichat man’a alom-lou alamlouva kijoh ahi. Atekahnan amahon sana abolnom nau mun aum le hiche leimun hin gram nanei hinam? Naneilou le solkal leimun ahi tia hutum toh ano u ahi. Abang chun thal thahat aman phat le hinkho huhna dinga kipe ahi. Chule abang mun ho chu sana bolna’a twi long hon asuhset ding jeh’a kijoh jong aum e ”




2020 kum khomiho Thinglhang lou lhona mun khat

Natong Company ho


Sepai hon thaneina achulhah (Coup) jouvin Chindwin Vadung pang chunglam le Uruk Vadung abang munho a, Sana bolna ho leimun thah alah-be lou vanguvun, abolna sau mun ho akeh-be be uvin, natong len company tampi ahung lut u akimun ahi. Hiche natong company len ho hi Monywa khopi le Mandalay khopi akon hung ahiuvin chule abang ho chu agam kimvel'a mihouthei hon Thunei Lamkai ho toh kihoutoh uva ajokham kham'a abol u ahi. 2021 Sepai hon thaneina achulhah (Coup) jouvin Shan Ni thalchoi ho le SAC khutnoiya um sepai ho akigom uvin sana tamna mun ho hutum'in achu uvin amahon akibol ujong aum e. Kum 2013 a pat 2017 sungin sana bolna mun Acre 1 chu lakh (15) in aman atan uvin, 2018 a pat in lakh (20/25) in aman atan uvin acho ding ho le ajoh hon sana tam le tamlou dung-jui jin akihoutoh uvin aman atan uve. Hitia abol jeh uvin aleimun neiho le acho ho kikh'a boina aumbek poi. Natong company ho kikh hihen, aleimun neiho le natong company ho leimun jeh'a boina ho hi jongle, khusung Haosa ho le nam Lamkai hon boina asuhcham peh jiu ahi.

Ahin, thaneina ahin chulhah (Coup) jouvin hitobang dinmunho aum tapoi. Kho Haosa hon masanga banga thaneina anei tahlou jeh le dan aumlou phat in athip gam tauve. SAC khutnoiya um gam Haosa, Police ho le thalchoi hon adeitah'a abol u ahi tai. Sepai Strategic Commander ho chu lhakhat le Sana tohna Myaw khat in lakh (10), Sepai Saplen (ရဲဘော်စု) ho lhakhat le Myaw khat a lakh (30), agam muna um Police le gam Haosa ho chu lhakhat in lakh (30), chule ၁၁၁၀/၁၅၀၀ ho chu lhakhat le lakh (100) apeh jiu ahi.



Uruk Vadung panga Sana bol jeh'a se leimun ho


Chule gambah sunga thanei ho le thalchoi ho jong natong company hon sum akeh kit nalai ji ahi. Agam sunga Miching mithem ho jong SAC khutnoiya vaihom natong ho tulai Gamsung umchan jeh'in athilbol'u adeimolheh'u jongle hinkho venbit ding angai jeh'in amohvet tauve.



Sepai Strategic Commander ho lhakhat le Myaw khat a lakh (10), Sepai Saplen (colonel) ho lakh (30), agam muna um Police le gam Haosa ho lakh (30), စရိတ် ho lakh (100) akeh jiu ahi.

Sepai ho thaneina achulhah masanga Khomite hon lou le ai khamna hi Nam dinmun a pat Gamsung thanei ho Changeiya atohnau meeting record Lim ahi.

Sana tohna sunga khonei sanahol natong le munchom'a kon hung tongho kibahlou dan le thaneina chulhah (Coup) jouva natong hung kibe ho dinmun ahi.



“Hiche lim akivet le thaneina chulhah (Coup) jouva hunglut-be Sana Myaw natong ho jat hi aumsa Sana Myaw sanga alhom joh vangin tu hin, hiche nunga hunglut natong hon jaotah'in phatchomna amuvin abangin masanga aumsa Sana Myaw hin atoh ngai banguva atoh dan u akimudoh e.”

Khomi Khat toh thudoh Bolna

“ Tu dinmun a hi keiho jong Ngaichat bukim aki hideh pon, imalam jousea lung kichatna toh kidim jing ahi. Sepai ho, Pyusawhtee, thal choi ho le Shanni ho gam Haosa ho le gamvaipo ho amun mun’a peh ding ngen ahi. Hetlou kah’a kithi thei, Lamkai koipen ahi jong kihe talou, abonuva kikicha jing ahi. Masang chun peh ding kho ding jouse khopi office a kipe a, boina aum jong le amahon ei-suh-lhap peh u ahi. Tua hi leimun boina hihen natongho kikh boina hijong le boina suhlhapna ding mun umlou ahi tai. Abang kon-khat hon amaho Ngaichat chanthei nadinga adih adihlou vetalouva thalchoi ho toh kikop a na atoh jeng ahi tah jeh’in avangse ahesoh mipiho maman kithoh jeng ahi. ”



Company hon khovel’a twikhol mun’akon Machine twi achop

Sana Bol Jal'a Hungkon Thilsoh ho

Chindwin Vadung pang jet-le-vei hi thingphung toh dim'a engsel a nomsel ahin, agam'a um khomite hon hiche Vadung twi hi dontwi, kin-le-donga aman'a honlei phailei twipehna a jong amanchah Vadung manlutah ahi. Chule Maga Watt 1200 pethei ding Thamanty Dam len khat tohgon chu 2007 le 2008 kum'in ahin tongpan uvin, hiche a pat chun Chindwin Vadung chunglam Homalin khopi le Khamti khopi changei vapang muntampi a Sana bol company len tampi le thing bol company tampi in mun ahinlo tan, 2015 kum chun hiche company alen aneo agomin company (100) val aum tai.

2010 kum U Thein Sein President a ahung kaldoh chun Machine lentah tah manga Sana le thing bol company len tampi ahung lut-be kit e. Hiche jou phat sotlouvin Chindwin Vadung twi hi thengthei talouvin aneh den jeng tan, mihem hinkho susethei leu gu-le-ai toh adim tan ahi. Chule hiche ho jeh chun song le nel in twilam jouse asuse gam tan Vadung a che le Meikhu-kong le Line Sethley ho jong chethei talou dinmun alhung e. Hijeh chun vapanga cheng khomite ho din gari lam umlou, hiche twilam-seh hi che le valena a amanchah u ahi-jeh in kholjin ahahsalheh tauvin ahi. Chindwin Vadung twi chu dontwiya amanthei tahlou jeh'uva twikul alai ule sum tampi abei kit uvin hiche twi thenlou jeh in bong le loi gencha tampi jong athi in ahi.



Kho kimvel jouse le inkhon chan geiya akipai mang song le nel dim dan

Chule 2021 kum'a Sepai hon thaneina ahin chulhah a, Gamsung achatvai lai-tah a Covid-19 jeh'a hahsatna ana um jeh chun, thilman sangtah'in ahung kalcheh kit in Sana bol Company tamtah ahung kibe kit in, gucha michom miphalou apung in, KANI louchang joh ahung pung-be in Khangdong mitampi alamvai jin alem gam e.



Sana bolna mun'a kon hung longlut twi phalouvin khomite honlei asuhset lim

Khangdong le Natoh

Sagaing Region chunglam'a um Homalin le Khamti khopi hi thinglhang kho tampi khopi ahi. The Spring Revolution sunga Sagaing Region National Identity Card number 5/ choi Khangdong ho hi Sepai hon nasatah in agingmon check ahabol jeh'in People Defence Force- PDF sunga jaolou Khangdong ho gamdanga school kai le natonga che ding hi ahahsan tai. Adeh a Homalin, Nanto le Khamti hi adang kho ho toh kijopmatna ahahsat dan akimun ahi. Kho sunga um Khangdong teho hi school kaiya Khal sung school kikha kah le honlei natoh ho abol in nulepa akithopi jiuvin, abanghon akimvel'a um sana bolna munho ah ajaovin sum akihol uvin, school akihon tengle school kai jiu ahi. Ahinvangin, Sepai jin thaneina ahin chulhah (Coup) jouvin, Khangdong mitamtah sepaiho vaihomna noiya um school ho ah akai nom tapon, Hijeh chun school a them jil bangkhai hon jom talouvin akimvel'a um sana bolna munho ah nulepa kithopi theina din na atong gamuve. Chuto bang chun numei tamtah jong them jil nading lampi umlou jalin sana bolna mun'a natongho din bu le me hon'in apang uve.

Khamnathei Lou ho

Masang lai chun Chindwin Vadung sana bolna mun'a um tehse lang hon kani-vom hi lou bangin amangchauvin, ahin 2008 a pat chun Kani-kang (No.4) le khamnathei louchang ho sanabol campany ho toh ahung lut-tha e. Masangjep gamvaipo ho lai chun khamnathei lou ho hi akham adol'in gihna khamna ana um jeh'in akihedoh beh poi. Sana bolna munho a ajoh aum vangin gamkai thuneiho kom'a tax apeh'a guh-thim'a ajoh u ahijeh chun akihedoh beh poi. Kho Haosa vaipo ho Khamnathei lou, Kani joh ho hi kho a konin jong anodoh jenguve tin thupeh ho'a konin aki he e. Abang khomi numei kiloikhom hon lou neho aman uvin, gamsung thuneiho khut'a apelut jiuve.

Ahin 2021 Sepaiyin thaneina achulhah jouvin Khamnathei lou ajoh/ane hon "Kotbei, akhambei Dinmun in aum e. Sana bolna munseh hitalouvin Khosung jenga jong ngam-tah'in ajoh tauve. Kolsum (500) man a jong kichothei dinmun ahi tan, an-che joh bangin gin neilou, aman ding jong umlou manlai chan ajoh tauve.

Khosunga lou-ne tamtah ahung higam hi golnop a hung kipan ahi uvin abanin khamnathei sunga akibol den gam tauve. Tullai tah'a lou-ne atamjo hi khangthahte ho ahigam tauve. Sepai jin thaneina achulhah (Coup) masanga khamnathei lou-ne ho hi kum (30-59) vel ahivang in tun kum (20) vel Khangdong lou-ne atamchek tan khoneova um Khangdong 70% ho hi lou-ne asoh gam tai.




Jan lam'a gambling kichepna mun



Sana bolna mun

Khamna thei loune akum dungjuiya vetchilna



Chunga kisun kholchilna chart in avetsah, record list ahin, agam'a um khomite (Local)mi khamnathei lou-ne ho bou kisim a kilaho ahin, munchom a pat na hung tong hole Company neiho kisim tha lou ahi.

Numeite le natoh dinmun

Eiho minam sunga hin numei akiti pou leh insunga an-ho twi-khai bol ding le cha le nao hing ding bep in igel jiuve. Tua gamkholna khomun ho ajong chutiman agel uve. Numeiho hi natohna mun'a na tong din koiman agel pouve. Ahin, numeite ho hi Jingkal ahung-tho uva pat jan imut geiyin chomkhat cha ong-manlouvin hinkho amang uve.

Adeh in Sepaihon thaneina ahin chulhah (Coup) jouva thilman ahung kal hi, adeh in sana bolna mun le khoneo sung ho ah thilman asang dehset e. Chelena lampi hahsat jal'a kholjin boina aum phat in thilman ho hop-3 changeiyin akal in ahi. Hijeh chun numei hon insunga ji-le-cha dalhan sanabolna muna natoh lheng louvin atoh thei chan atongin sum ahol uve. Abang numei chapangho chu company alut in bu-le-me hon in apang uve. Hiche an-hon natoh hi hahsa l'leh jong leh, midang natong hon lhasum lakh (3) asan le amahon lakh (10) ahi lou le lakh (15) bou asang uve.



Sana bol jeh'a twi kang a myaw akon hung longlut nel adim dan lim

Hutum Engbol Dan

Sana bolna Myaw neihon numei chapang ho hi ajangkhaye tin natongin akou uve. Chuti chun numeiho chu pasal mitamtah lah'a natong ahi phat uvin, pasal ho dai-eng, bol-eng achang uvin, abang numei ho chu lungthim lamseh hilouvin pasal hon atahsa'u jong tongkha leuvin bal-setna atoh uve. Hicheho jeh'a natoh haiya inlam kile ding agel'u jong le insung hahsatna jatchom chom jeh'in ima seingam bolngam louvin athip jeng uve. Nu le pa hina a bol-set achan kalval uvin hinkho pelou jong aum in ahin sum guh-thol in koima hetlouva kichai hesoh genthei toh numei adim e. Lunglhai lou jeh'a hehding atiu jong le ahehna diu mun jong umlou dinmun atoh uve.

Hiche thudol'a khomi khat toh kihoulimna

“ School kai ding akigon jong le school akihong pon, Khopi muna'a che a natoh hol ding, thil joh ding akiti jong le che-le-vale ahahsa e. Hijeh a insung hahsatna ho themkhat beh akingai jang khat leh tia sana bolna mun Myaw a buhon mehon a kipang ahi. Bu ho mehon akihi vangin nilhum keiyin kichol phat umlou leuvin toh ding jouse akitong ji e. Myaw ho chu gam'a um ahi jeh chun numei changkhat che-le-vala kicha tah'in hinkho akimang e. Pasal hon lah'a kium ahi jeh'in amaho lunghan ding kichatah in hinkho akimang e. Eima le eima akium jong le hichenu hi numei phalou numei kituplou tin aseu uvin, phatea akiumlou jong le itahsa tongkha in kichepna mi aneinom jiu ve. Hicheho jeh'a inlam kinung-le ding akigon jong le amanu hi natoh thase tin aseu kit uve. Abang chu phatea hinkho aman jeh'a natoh neiho lungset changa sum themkhat ahin mu u jong leh amanu hi aphalam a sum amu hipon te tin seiset akichang kit e. Hiche ho jeh'in khat vei vei le leiset chungka kahin nom tapoi” tin Sana bolna Maw sunga bu-le-me hona um numei khat in aseiyie. ”

Damdoi Lam

Sana bol phat teng sana matna dia kimang cinnaba kiti (ငါး) twi ho chule machine len hoa aman chah u Cyanide gu-twi ho jeh'a Vadung twi-ho gu-twi ahung-so ding thudol'in 2014 chun kei ho in hilchetna kana bol tauvin ahi. Ahivangin khomite hon hiche ho gu-twi aso-ding chu atahsan thei pouve. Khomite hon twi jouse aki om-min le gu-aumpon donthei nehthei ahi tin apom chahkkeh uve. Hiche sana bolna sunga amanchah u cinnaba gutwi ho chu khovel'a vakom, vatwi mutin alhungin genchaho athi'n chule hise apunsah in ahi. Chapang ho le khangthah ho chungah hiche gutwi athanei lou vangin, masang company len ho ahunglut masanga tehse ho dam dan ho toh akivet-kah le tunung hin ahinkhou achom'in aha thi dan u akimudoh e. Ijeh inem itile twi-thenglou don jeh le thing le song aum tahlou jeh'a dap-le-sat ahung san jeh ahi tin khomi khat in aseie.

Abang Khosung miteho dinga mihaosa hon twikul alai-peh vang chun, leiset sunga chemical gu-twi ho alut jeh in 2015 nung lam in numei Naovop ho masanga sangin naokhe atam dan aki mudoh e.



Kho kimvel jouse Myaw twi phalou twikong hoa adim dan lim

**Mai makho Federal Democracy
solkal ho henga Thu-ngehna**

Solkal lamdol'a chamna umlou, Thutah'a vaihomna umlou, Chindwin
Vadung chunglam'a sana kibolna jouse ngahsah ding.

Kho le venga um thalchoi hon khomite ho sana bolna dia ahonlei hou
hutum a ajohsah chule ajoh natei diuva ano hou agan nathei chan'a
ngahsah ding.

Gamsung a thingna louna ho venbitna dinga Dan le Danpi kisem teng
khomite ho le amaho chondan ngainaho chintup theina ding dan ho
kicheh tah'a sempeh ding.

Asuhset sau leimun le honlei ho nung semphat theina dinga panpina apah
ding.

CASE STUDY - 1

Khomin - [REDACTED]

Inn lap - 00 (Minkhel - Leikot)

Kho Thusim le Natoh Kilolvahna

Leikot kho hi kuki te chenna khoneo khat ahin 1957 kum'a hung kitung-doh ahi. Homalin khopi, Malin gambih, Chindwin vangdung solam'a um Kuki khoneo khat ahi. Tuhin khovel'a sana bolho jeh'in kho hi ase dinmun in aum tai.

Khomite hi adeh'in thinglhang lou-lho in akivah uvin, insung neh le chah din aphant toh kitoh anche theiga aboluva kivah ahiuve. Khomi themkhat bou-vin phailei abol uve. Insunga sum le pai muthei nadingin golei, Da-ngin lei ho abol uvin, phalbi sung ahin Vadung pang dungah Mye-be le ankam leiho abol jiuve.

Masang jep chun chapangho school fee ding le Christmas sunga Manchah ding sum hi khovel'ah ajokham kham uvin akhut in alai uvin sana akibol jiuve. Leikot khomun hi adang khotoh banglouvin leinoin bouseh hilouvin lei hi feet khat akilai jongle sana kimuthei ahi. Hijeh'a khomite hin machine ngailouva amah go-lei hon-lei
hoa baicha'a sana akibol thei u ahi.



Notice: Phat le hun hoilou kiven tuptheina din khomin hohi min lhem aki pen ahi.

Company len ho le Machine ho ahung lut thu

2010 jou chun Tin Win Tun thingbol campany ho le adang sanabol campany ho aban ban in ahung lut in ahi. Akipatna chun Khosung a pat mile 3 le 4 gamlha, khomiteho loulhona mun ho 40000 or 50000 MMK apeuvin na atoh vanguvun phat sotlouvin khovel hon-lei, go-lei ho le phailei ho changei-yin ahin susegam tauve.

2015 nunglam in khomite leimun ho ahung setgam jeh'in loulho thingpoh ahung hahsa tan Hijeh chun amahon jong ajokham kham uvin sana bol hi kivahnan ahin neipan uve.

Tuhin, sanabol'a kivah khomi hi mi (10) aum uvin, munchom'a hungbol hi mi (15) aum in ahi. Munchom a pat sana hung bol ho lah'a [REDACTED] ho hi sanabol company len ho lah'a minthang ho ahiuve.

Coup jou kho dinmun thudol'a khomi khat thudoh bolna

“ Coup jou hin, adang sana bolna mun Myaw ho ahin company dang athah thah ahung lut-be be in, hilai Boljang mun ahin company athah ahung lut-be poi. Ahivangin aumsa Company len ho natos akeh-be be uvin chule machine len athah ahung lut-be be in ahi. Khomi sana bol hon machine neo ho bou aman'a na atoh ahin adang company ho banga machine len-tah tah mang ahi pouvin chule Diesel man ahung san behseh toh sepai, police thalchoi ahung jouse sum kipe ahi jehchun abang khomi hon atongjou tapouve. Chule hiche Coup jou hin khamnathei Kani aneng in manlai chan ajoh kit uvin khomite atamjon hiche khamnathei lou ane-gam tauvin numei ho jong ajau gam tai.

Masanga atoh ngaiyu go-lei ho jong umgam talou, hon-lei bol ding jong songgel dimden ta, thinglhang lou-lho ding jong eiman akibol vanga eiman aga kinekha talou, louva iche jungle abeisa ahin, chule eima khomun'a sana um'a michom hon ahung kibol adih poi, eiho jong bol ute tia kibol ahi. Hiche ho akichai teng, munchom a hungho akho a kinung-le diu, eiho khonei ten nung le ipi kibol a ipi kine ding hitam atie.”

CASE STUDY - 2

Khomin – [REDACTED]
Innlap – 230 (Minkhel – Naung Hke)

Kho Thusim le natoh Kilolvahna

Naungkhe kho hi Khamti gamkai, Homalin khopi sung, Naungtaw gambih sung, Uruk Vadung panga um kho ahi. Kho kimvel ahin (Lake)twikong len-tah aum in, hiche munchu sana abol jeh uvin tun hiche (Lake)twikong or Pat jong chu akang tan ahi. Masanga chu khomiten hiche twi chu honlei bolna, phailei chang tuna aphot dungjuiya muchi ho ankam, be ho bolna, nga matna hoa amanchah jiuva chule a bang konkhat insung mite hon on kah a sana jong akhut uva akibol jiu manlu tah mun ahi. Ahin, tu-in masanga abol u natoh ho atoh thei tahlou jehuvn hiche sana bolna Myaw kiti machine toh sana holna mun achun natongin atamjo alut'un ahi.

Chule hiche Uruk Vadung hi twi-lam adeh a kholjinna le chele valena a kimang ahi. Ahivang in kum 2000 nunglam in hiche Uruk Vadung hi song le nel in ahin-lo tan twi-lam a che Sethlay (Boat) ho chuh sungbouvinnache le thei beptan ahi.

Notice: Phat le hun hoilou kiven tuptheina din khomin hohi min lhem aki pen ahi.



Machine len Company ho Hunglut Thu

Uruk Vadung pang Nantaw kho le adang kho mun tampia machine len manga sana abolnau hi kum sotpi che ahi tai. Ahin, Khenam kho sunga machine len Company hon sana ahung bol uhi 2000 kum a hung lut pan bep'u ahi. Khenam khoa um Sana bolna Shwemaw hi mun len-tah ahin Myaw agom'in (500) vel aum in ahi. Akho muna Sana myaw bol hi mi (197) aum in chule mun danga hung bol mi (141) aum in hiche lah'a ~~hi Sana Shwemaw, hi Myaw Myaw hi hi Sana Shwemaw~~ ho hi Shwemyaw Company len minthang ho ahiuve. 2021 kum Coup jouva athah hung-lut be myaw hi (42) aum in ahi.

Coup jou kho dinmun thudol'a khomi khat thudoh bolna

“Sepai ho thaneina ahin chulhah (Coup) jouva mihem ho chele vale kimanchah dan ho ahung kikhel e ti thei ahi. Sana bolna Myaw mun ahi jeh'in mi namkim aum in, Gamsung aboi kit jeh in boina khat hung soh kha-leh ahehna ding pichal la aum pon, tin ginchang tah a um jong mi aum e. Masang jep chun Gamsung anop jeh'in mihon Jalenna anei uvin boina jong tam danin aum e. Tua hi boina aum a sum naneilou le akichai ahi tai. Khamnathei lou, Kani ho jong lampang a pheh'a kijel bangin aneng-deh in ahi. Hijeh in khangnou Khangdong mitampi hinkho alem tan ahi”



နောက်ဆက်တွဲ

Shwemyaw Company nei ho list le Coup jouva athah hunlut-be Company ho

No	Kho/Gold Mining site	Local Company	Non Local Company	Additional After Coup	Agom
1	Hkenam kho	197	241	42	480
2	Maikai kho	87	318	45	450
3	Molin kho	8	144	28	180
4	Boljang kho	10	15	-	25
5	Khomunnom kho	8	17	6	31
6	Marlone	6	34	12	52
7	Khonomphai	8	232	50	290
8	Manly	4	5	5	14
	Agom	328	1006	188	1522

Khamnathei Lou-ne ho List

No	Kho/Shwemaw/ Inlap	Pasal		Numei	Dinmun		Agom
		Khang dong	Milen		Achep	Kikap	
1	Hkenam kho (230)	204	150	30	40		384
2	Maikai (280)	245	130	28		10	403
3	Moelin (40)	35	21	14	49	20	70
4	Boljang (20)	20	5	2	25	5	27
5	Khomunnom (50)	20	8	3			31
6	Marlone (300)	260	178	15	70		453
7	Khonomphai (25)	7	4	1			12
8	Manly (130)	41	26	13		29	80
	Agom	832	522	106			1380

Hetding – Chunga kivetsah list hi khomi (khomun) a um khamnathei Lou-ne ho bou ahin, munchom a hung Myaw natong ho le Company neiho jaolou ahi.

1. Kuki CSOs in 2015 kum'a lekhaleng aso Chindwin vadunga mining bol ngah ding.

PHOTO REPORT

